

陶雲汀先生奏疏

奏摺卷十八目錄

撫蘇稿

安化陶澍

督催京口漕船摺子

附片一件

籌催徒陽漕船併回省督償後幫摺子

請緩江淮積歉各屬錢糧摺子

總督會稿
附片一件

挑辦蒲匯塘動用銀兩摺子

覆奏督催漕船情形摺子

籌撥展賑口糧銀款摺子

總督會稿

籌催蘇省重運及浙江過境幫船全數渡江摺

子

清釐江藩庫附貯借放各款摺子

故員追項無完請俟伊子補官坐扣摺子

附片
一作

御賜藥錠謝

恩摺子

奏請獎勵催漕出力各員摺子

酌議三次清查案內子孫代賠追補請量爲變

通摺子

督催京口漕船摺子

附片一件

奏爲京口漕船淺滯

微臣

親赴鎮江督僸辦理緣

由仰祈

聖鑒事竊照徒陽運河自去臘十九日開壩卽提跨
兌鎮常漕米之幫船飛挽渡江駛入瓜口其時
江口潮入之所水深六尺四寸全河一律深通
足資浮送蘇常各船亦俱報開臣卽回蘇督飭
各縣幫星夜趕兌跟接前行詎自臣旋省後西
風日起江潮陡落直至正月初三四五六等日
大汛期內始每日有渡江漕船四五十隻或八

九十隻共計過船二百數十隻自初七以後風色仍然未順每日僅過船一二隻臣得報不勝焦急當於十一日自省登舟趕赴徒陽勘辦經過常州各境水勢尚足自過呂城關以北卽覺微淺兩岸潮痕低落尺餘水勢向北退流知係江水枯耗之故十四日馳抵丹徒關沿河測量水勢均止一二尺不等各船淺滯難行其西關金門前此開壩時底水積深九尺有餘現亦僅止六尺二三寸連日西風更甚又復刮耗四五寸已飭各關下板收蓄待潮啟放查該處運河

本係鑿山而成專藉江湖灌注既不比有源之水偶值微弱可以築壩擎托又無相近湖河可以車水接濟向來重運經臨須俟春潮暢旺本年各屬軍船絡繹早開本爲向所未有適值有閏之年甫交春令冰凍未融而十數日來西風大作江水愈形消耗以致潮枯漕行淺阻卽已近江口之船亦難逆風對渡臣上年卽經慮及請將漕船由橫閘出江沂行惟查閘門內外水勢亦淺其由閘口出江之磁瓦灘等處水深僅止五六寸民船叢萃現在設法疏通一面甯撈

爬刮如此路可通自較內河更爲直捷其內河
停滯之船仍飭同該道府督縣加用天關地牛
挽曳一俟風回潮旺河路疏通各船暢行銜尾
渡江卽當飛速馳

奏以慰

宸廑所有臣親赴鎮江督僱漕船情形謹會同督臣

兼署漕臣琦善恭摺具

奏伏乞

皇上聖鑒謹

奏

道光七年正月十五日具

奏二月十五日奉到

硃批另有旨欽此

硃批

正拜摺間西風已息漸轉南風潮水灌入口門

可喜頓增一尺有餘查日內本係大汛之期再得風

轉東南即可乘潮放渡惟各船攢集江口地窄

人稠臣仍暫駐數日設法僱通務俾迅速之中

倍臻穩妥仰副

聖主慎重漕糈之意合併附片具陳謹

奏

道光七年二月十五日奉到

硃批知道了欽此

道光七年二月初八日准

兵部火票遞到

軍機大臣 字寄

江蘇巡撫陶 道光七年正月二十九日奉

上諭陶澍奏京口漕船淺滯親赴鎮江僭辦一摺本年
起運南糧曾經降旨令有漕督撫早兌早開於
四月二十日以前趕抵禦壩五月初旬全數渡黃
無許稍誤期限茲據奏自徒陽運河開壩後計渡

江軍船二百數十隻因西風大作江水消耗以致
漕行淺阻卽已近江口之船亦難逆風對渡至橫
閘出江之路該撫上年曾經奏及朕以漕船由運
河行走較爲穩妥令該撫察看情形相機籌辦現
在該撫查閘門內外水勢亦淺設法疏通甯撈爬
刮其內河停滯各船飭地方官加用天閘地牛挽
曳又另片奏正拜摺間西風已息漸轉南風潮水
灌入口門頓增一尺有餘再得風轉東南卽可乘
潮放渡等語可喜之至該撫惟當設法僭通乘此
風轉潮旺催令軍船銜尾渡江不許稍有脫幫倘

江水復形消耗必須由橫閘出江著該撫相機辦理尤應倍加妥慎毋稍疎虞總須遵照前旨於四月二十日以前全抵禦壩愈早愈妙斷不可誤渡黃期限是爲至要將此諭令知之欽此遵

旨寄信前來

籌催徒陽漕船併回省督僱後幫摺子

奏爲籌催徒陽漕船並

微臣

回省督僱在後各幫

以速全運仰祈

聖鑒事竊照京口漕船前因西風日久潮枯淺滯經

臣馳抵丹徒設法僱辦業已

奏明在案

臣

因本年漕務與河務利害相關其遲

速機宜迥非往年情形可比而徒陽係屬潮河

視江水爲盈縮一遇西北風多卽船抵江口亦

難對渡其橫闢出江之路本屬直截無如江潮

耗落外水反低於內水且亦非東風不能泝流

是以仍從內河行走連日督同常鎮道劉名載
鎮江府竇欲峻暨各員弁分段籌催將小淺各
處竭力罾撈並經丹徒縣吳浚將切近江邊之
利涉橋下加挑五六尺俾潮來時更添一路與
江口潮汐同資灌注其西閘南閘橫越二閘均
卽抵縫貼席潮來時放船納水潮退時立刻下
板收蓄復將臣前此巡漕時製存縣庫之撈沙
鐵箕沿河刮刷深通日來春雨未流江水雖形
枯落而內河蓄水漸深已有三四尺潮來足資
浮送惟風色未能渡江隨將後船節節迎提跟

船攢集一俟風轉東南瓜洲陞旂招渡卽行銜
尾出江現在小汛期內風順時每日過船四五
十隻七八十隻不等統計已過十一幫此後春
水方生當可益加暢順惟在後船隻尙多必須
接續前來庶歸迅速臣暫卽回省迎饋松太各
幫仍派同知劉埏富康知事陳洙巡檢謝元淮
隨同道府暨督臣委員副將明玉守備積昌等
按段晝夜嚴催無使鬆勁至蘇省糧賦繁重甲
於天下而蘇松太三屬尤疲此次迭飭嚴催並
經該府陳鑾李景嶧署太倉州李廷錫設法籌

辦不遺餘力接據糧道湯藩稟報已於正月十八日尾幫一律全開計蘇省漕白四十三幫均已離次較之往歲開竣之期早至一月有餘此後浙江幫船跟至即可源源北上足紓

廩注所有徵臣籌餉漕船並回省迎提各幫緣由理合繕摺具

奏伏乞

皇上聖鑒謹

奏

道光七年正月二十四日具

奏二月二十三日奉到

硃批一力督催北上不可失時遲緩欽此

請緩江淮積歉各屬錢糧摺子

總督會稿
附片一件

奏爲查明江淮各屬積歉州縣帶徵熟田舊欠錢糧並六年漕價一時未能完納恭懇

聖恩俯准緩徵以紓民力事竊照江淮揚徐海等屬道光六年夏秋雨水連綿並因壩水下注田禾被淹業經

奏荷

恩施分別給賑蠲緩並將山陽等州縣成災五分以上之熟田錢糧

奏請緩徵欽奉

諭旨准行均經恭錄轉行欽遵辦理茲據江寧布政使張志緒轉據上元江寧句容江都銅山豐縣沛縣碭山睢寧海州沐陽等州縣並徐州衛先後稟詳因係連年積歉之區戶鮮蓋藏上年又被重災其成熟田地類多毘連災區民情困苦若帶徵各年舊欠錢糧力有不逮懇請緩至本年秋後啟徵並據海州沐陽桃源三州縣聲請將應徵道光六年熟田漕價銀兩一律緩徵等情由司飭府覆查明確詳請具

奏前來伏思復熟田地各年緩帶銀米例應啟徵

漕價銀兩尤屬緊款惟查道光元二兩年秋被災歉因上元等州縣成熟之區民情拮据於情形案內彙請將歷年舊欠銀米緩至次年秋後啟徵有案今淮揚等屬上年被災較廣淹浸甚久顆粒無收雖間有成熟田地類多毘連災區且係頻年積歉處所小民元氣未復較之元二年間各州縣情形更重現在察看力難併完舊欠而海州沐陽桃源漕價雖係新賦民力實屬拮据亦難啟徵

臣

陶澍前於籌辦災民摺內欽

奉

硃批務要隨時妥行督辦勉副朕痾瘝在抱之意有
應奏者據實奏請可也等因欽此仰見

聖主塵念災區

恩加無己之至意所有現查積歉各區帶徵熟田舊
欠錢糧併熟田漕價未能完納情形

臣

等覆核

屬實相應仰懇

聖恩俯准將上元江寧句容江都銅山豐縣沛縣碭
山睢寧海州沐陽等十一州縣並徐州衛應行
帶徵嘉慶二十三四五並道光元二三四五等
年熟田舊欠錢糧漕價及海州沐陽桃源三州

縣道光六年漕價銀兩一律緩至本年秋後帶徵以紓民力除飭查造應緩款冊另行咨部外謹合詞恭摺具

奏伏乞

皇上聖鑒謹

奏

道光七年正月二十四日具

奏二月二十三日奉到

硃批另有旨欽此同日奉到道光七年二月初八日

內閣奉

上諭琦善等奏查明江淮各屬積歉州縣錢漕懇恩
緩徵一摺江淮揚徐海等屬上年雨水較多並因
壩水下注田禾被淹節經降旨分別給賑蠲緩所
有成熟田地類多毗連災區且係頻年積歉民力
不無拮据加恩著照所請將上元江寧句容江都
銅山豐縣沛縣碭山睢寧海州沐陽等十一州縣
並徐州衛應行帶徵嘉慶二十三、四、五暨道光元
二、三、四、五等年熟田舊欠錢糧漕價及海州沐陽
桃源三州縣道光六年漕價銀兩一律緩至本年
秋後帶徵以紓民力該部知道欽此

再准揚等屬上年被災迭奉

聖恩賑卹平糶業經次第辦理方被淹之初災民四出謀食饑疲奔走殊形困苦

臣

等當飭各州縣

勸捐分數收養計蘇州江寧揚州鎮江松江等處人數尤衆往來留送多者萬計少者數千原議收養三個月嗣因田廬未盡涸出又復飭屬設法展限留養不拘月日各盡其力之所能茲

臣

陶澍自蘇來鎮經歷各屬面接該境紳士商

議再展月日俾饑黎得俟春麥時回籍併就近查詢通州江都甘泉儀徵各處災厥情形均可

再展月日竭力籌辦至被水極重各區田廬坍塌富者亦貧本難再籌捐濟現亦辦有成局雖數目無多不能如江以南收養之衆而於鄉里任卹之誼亦不爲無補前據署阜寧縣許心源稟報會同縣學及好義紳商捐銀錢八千有餘儘買米麥減糶散濟轉轉運至金盡爲止以資春深接濟又據東臺縣孫世藻稟報該縣紳士馮其瑚等誼篤桑梓踴躍勸捐現已捐錢二萬二千餘串併銀兩麥石散給本處災民之用就所捐之數於歲底散給一次以爲度歲口糧

又於鰥寡孤獨老疾殘廢者倍其錢數另行放給一次餘於今歲二三四月每月放給一次以爲青黃不接之需其餘或買米減價平糶或備辦醫藥煮粥施棺應用又興化縣劉善采稟報設局勸捐截至十二月初二日已陸續捐錢三千數百串挨戶給票每大口每日給米二合折錢散給小口減半於十二月十六日設廠給放又據高郵州李宗穎稟報截至上年歲底城鄉共捐銀米合銀一萬餘兩由紳董分路散竣又據寶應縣葉維庚稟報前經各戶捐錢三千餘

千並又湊捐米糧自數十石以至百餘石不等均聽各董事自行經理不涉胥役之手又鹽城縣臧新芝稟據紳士舖戶及文武各員捐米一千餘石在本城給票於十二月初十日設厰每口每日給米三合其鄉鎮饑民經該縣勸諭董事各處捐辦米石就近散給又署秦州王有慶亦稟稱設法倡捐約共銀二萬餘兩於歲底分厰在各鄉鎮經紳董經理散放此皆被災之區捐助亦尙踴躍至江廣資送災民均係未議收養之前流徃現已按口查明照間賑歸來之例

一體補給以廣

皇仁所有各屬辦賑人員奔走業已半年尚無貽誤
實緣此次災務甚重鳩形鵠面見者惻然不肖
之心頓息復經臣等三令五申諄切訓誡務俾
實力經理災民尚俱得所地方救謐堪以仰紓
宸注所有各屬留養儘力再展月日並災區籌辦捐
濟情形合併附片以

聞謹

奏

道光七年正月二十四日附

平定回疆方略卷一百一十一
奏二月二十三日奉到

硃批知道了欽此

挑辦蒲滙塘動用銀兩摺子

奏爲挑辦松江府屬蒲滙塘河道工程動用存公
閒款銀兩恭摺具

奏仰祈

聖鑒事據蘇州布政使賀長齡詳稱竊照松江府屬
蒲滙塘河道坐落華亭婁縣上海青浦四縣境
內該河係爲早年引水潦年洩水要津向來循
照業食佃力章程辦理前於道光三年間前任
蘇松太道龔麗正因是河淤塞積水不消勘明
必須疏浚俾可宣洩以時種麥是年被災較廣

民力未逮而該河又係刻不可緩之工約估銀一萬兩當經借動海關積餘平色曹紋銀五千兩又續動銀三千兩並由該道捐銀一千兩共銀九千兩給發上海縣銀三千五百兩青浦縣銀一千五百兩華亭縣銀一千兩婁縣銀二千八百兩扣存道庫銀二百兩續據華亭縣繳回餘剩銀二百三十七兩零婁縣繳回餘剩銀二百一十八兩零統計共用銀八千三百四十四兩零內除由道捐銀一千兩實應開銷銀七千三百四十四兩零准蘇松太道移請比照道光

三年太倉州拯辦水災議請抽挑劉河七浦等處工程將劉河工費節省項下本息銀兩動撥挑辦咨部成案均於海關庫內積餘平色項下動支辦理卽經由司將動用銀數詳請咨部立案節奉部覆凡工程銀兩自道光四年奏定無論動用何款數在五百兩以上者應專案奏明辦理等因相應遵照部行具文詳請核

奏等情前來臣伏查道光三年分松江府屬挑浚蒲匯塘河道工程係爲宣洩積水急圖種麥救災起見核與太倉州抽挑劉河七浦等處情事

相同惟所辦工程既無本款可支兼係積款之區無力賠繳惟有海關積餘平色銀兩本係解司存公之款以之辦理地方緊要事件洵堪動用相應請

旨准其照數開銷以清積款所有挑辦松江府屬蒲滙塘河道工程動用銀款開銷緣由謹循例

奏明伏乞

皇上聖鑒謹

奏

道光七年正月二十四日具

奏二月二十三日奉到

硃批另有旨欽此又同日奉到道光七年二月初八

日內閣奉

上諭陶澍奏挑辦松江府屬蒲匯塘河道工程動用
存公開款銀兩一摺江蘇松江府屬蒲匯河道坐
落華亭婁縣上海青浦四縣境內前因日久淤塞
積水不消道光三年經該道勘明必須疏浚借動
海關積餘平色銀應開銷七千三百四十四兩零
茲據該撫查明此項工程既無本款可支兼係積
歉之區無力賠繳著照所請准其援照成案於海

關積餘平色銀內照數開銷以清積款該部知道
欽此

覆奏督催漕船情形摺子

奏爲恭摺覆

奏事竊臣於二月初八日承准軍機大臣字寄道

光七年正月二十九日奉

上諭陶澍奏京口漕船淺滯親赴鎮江僱辦一摺徒
陽運河開壩後計渡江軍船二百數十隻因西風
大作江水消耗以致漕行淺阻卽已近江口之船
亦難逆風對渡現在該撫設法疏通加用天關地
牛挽曳又另片奏正拜摺間西風已息漸轉南風
湖水灌入口門頓增一尺有餘再得風轉東南卽

可乘潮放渡等語該撫惟當設法僭通乘此風轉
潮旺催令軍船銜尾渡江不許稍有脫幫倘江水
復形消耗必須由橫關出江著該撫相機辦理尤
應倍加妥慎毋稍疎虞總須遵照前旨於四月二
十日以前全抵禦壩愈早愈妙斷不可誤渡黃期
限是爲至要等因欽此伏查徒陽漕船前因西風
潮弱雨水復稀致有淺阻經臣親赴勘視指示
機宜督同該道劉名載該府竇欲峻暨委員等
用鉄製簸箕沿河爬刮並飭丹徒縣吳浚於西
關內利涉河邊抽挑深溝旁納江潮遇小汛時

卽排車戽水俾資接濟其橫越二閘專派閘官
陶佩玉晝夜巡守以時啟閉自黃泥壩至丹陽
境內專派署縣張祈諤帶同知事陳洙擇要爬
疏無許停阻惟西閘門外至江口一帶無可攔
蓄一遇潮退江水頓落船不能出臣初擬用沙
囊堵塞潮至則啟復經該道府等議設活水板
閘上用大木橫於兩崖下用直木爲柱兩旁鑲
合中間留檔通舟豎板爲門潮來時啟一板而
各板俱鬆抽卸旣易蓄送較靈雖小汛期內亦
得挨次放船截至二月十三日止已渡江二十

四幫計船一千一十餘隻尚有十餘幫攢集徒陽境內候潮卽渡已可不由橫閘出江總之今年漕運爲河務一大轉機而江蘇糧船居全漕之大半爲數尤多兼以浙江軍船亦從徒陽行走倍形喫重臣往來河干設法督辦不使脫幫日內春雨應期甘霖迭沛河水亦增浙江漕船跟接而來已過澣墅關一十二幫温州等三幫亦報入境祇剩杭嚴等六幫臣已知會浙江撫臣劉彬士催飭前來日內卽可抵蘇臣惟有竭力督催速益求速俾得及早渡黃以全大局斷

硃批好

不致有稽四月二十日以前抵壩之期所有現在督僦漕船情形理合繕摺覆

奏仰慰

宸懷伏乞

皇上聖鑒謹

奏

道光七年二月十六日具

奏三月二十四日奉到

硃批知道了欽此

籌撥展賑口糧銀款摺子 總督會稿

奏爲籌撥展賑需用銀款恭摺具

奏仰祈

聖鑒事竊 臣等接准部咨道光七年正月初二日內

閣奉

上諭上年江蘇省高郵等州縣被水歉收業經降旨分別蠲緩給賑小民自可無虞失所惟念今春青黃不接之時民力未能饒裕除句容縣六七分災及泰州九分災極次貧民毋庸接濟外著加恩將高郵興化東臺寶應江都甘泉山陽阜寧清河安

東鹽城上元江寧江浦海州沐陽等州縣被災十
九八七分極次貧民並六分災極貧同秦州十分
災極次貧民及淮安大河二衛坐落各縣饑軍均
予展賑一月邳州成災五分及勘不成災各營社
宿遷縣勘不成災北一等三十七圖沛縣成災五
分坊一等十二里乏食貧民加賞一月口糧蕭縣
勘不成災坊一上等二十七里半徐州衛屯坐蕭
縣孝三等十一里沛縣千一等五里沐陽縣六分
災次貧及勘不成災之塘溝等保鎮乏食貧民賞
給一月口糧貧生兵屬饑軍並著一律照辦用示

朕履端布惠慶洽蒸黎至意該部卽遵諭行欽此
卽經恭錄行司移行欽遵去後茲據江寧布政
使張志緒詳稱高郵等各州縣本年展賑及加
賞一月口糧應照正賑戶口核計又上冬未經
請賑今春始給口糧各處現飭委員查報通盤
約計共需銀五十六萬數千餘兩除上年正賑
撥項餘存及各屬散放撫卹正賑餘剩銀兩堪
以撥抵應用外尙不敷銀十三萬餘兩又各屬
外出災民間賑歸來如在展賑以前回籍亦需
籌備以濟支放前經咨准江糧道移覆道光六

年秋撥案內報存銀一十六萬七百二十兩零
堪以撥用應請儘數撥抵等情詳請

奏明撥用前來 臣等覆核無異相應

奏懇

天恩俯准將江糧道庫存銀一十六萬七百餘兩照
數動撥以資接濟事竣核實造報如有多餘另
行報部撥用除飭該管道府督飭印委各員趕
查戶口核實散放務期實惠均沾仍隨時嚴密
察訪如有胥役剋扣冒濫情弊立即據實嚴叅
究辦外所有籌撥展賑口糧銀款緣由謹合詞

恭摺具

奏伏乞

皇上聖鑒謹

奏

道光七年二月十六日具

奏三月二十四日奉到

硃批另有旨欽此同日奉到道光七年三月初六日
內閣奉

上諭琦善等奏籌撥展賑及加賞口糧需用銀款一
摺上年江蘇高郵等各州縣被水歉收前經降旨

於青黃不接之時按成災分數分別展賑一月及加賞一月口糧茲據該督等查照正賑戶口並上冬未經請賑今春始給口糧各處通盤約計共需銀五十六萬數千餘兩除正賑存剩銀兩撥抵外尚不敷銀十三萬餘兩此外如有外出災民間賑歸來在展賑以前者亦需籌備支放著照所請准其於江安糧道庫存道光六年秋撥銀一十六萬七百餘兩照數動撥以資接濟事竣覈實造報如有多餘另行報部撥用該督等卽飭該管道府嚴督印委各員覈實散放務期實惠及民如查有尅

扣冒濫影射情弊卽據實嚴叅懲辦該部知道欽
此

籌催蘇省重運及浙江過境幫船全數渡江摺

子

奏爲籌催蘇松等屬重運暨浙江過境幫船全數
渡江完竣仰祈

聖鑒事竊照本年起運漕米欽奉

諭旨務於四月二十日以前趕抵禦黃壩經臣疊飭

趁早兌開於正月十八日蘇松常鎮太五府州

額漕一律離次開行惟因徒陽一帶風水稍稽

經臣親往勘視指示機宜督率該道府縣委員

等設法籌辦業將督僱情形並渡江船數先後

具

奏旋接兼署漕臣琦善咨會正月十二日已將鎮

江後幫等船盤驗過淮又准漕臣訥爾經額咨

會截至二月十七日已過淮漕船二十五幫計

一千八百餘號臣以前船既早過淮後船尤應

接續卽又委員按段押催不許稍有脫幫茲據

常鎮道劉名載鎮江府知府竇欲峻稟同各員

弁等晝夜催償不遺餘力並未片刻逾延截至

二月二十三日蘇松等屬漕船一千八百六十

九隻業已全數渡江其浙省幫船前經臣咨會

浙江撫臣飭催挽運來蘇復經該道府等迎提
前進跟接抵口遇風卽渡截至三月初十日浙
船九百八十一隻亦經掃數渡江完竣伏查本
年蘇浙兩省漕船共六十四幫爲船二千八百
五十號數居各省全漕三分之二皆由京口渡
江該處水無來源僅藉一綫江潮爲之接濟本
年雨水節遲西風日久潮枯阻渡經臣督同道
府各員梭織巡催前提後押自丹陽以至江口
各船銜尾跟幫毫無脫空是以潮雖枯而水仍
蓄風一順而船卽通現在全船渡竣比之道光

元二三四四年兩省軍船於四月及閏三月全行
渡江之期早至一月有餘卽比之道光六年蘇
糧海運僅止浙船於三月二十日過江之年亦
早至旬日妥速駛行爲向所未有各該員仰承
旨諭竭力儻挽始終罔懈現在全船渡江距淮僅止
數程謹遵

欽限四月二十日全抵禦黃壩之期尙可趕早月餘
源源北上堪以仰副

宸厪所有臣籌催蘇省漕運及浙江過境幫船全數
渡江日期理合繕摺具

奏伏乞

皇上聖鑒謹

奏

道光七年三月十二日具

奏四月十三日奉到

硃批知道了欽此

清釐江藩庫附貯借放各款摺子

奏爲清釐江寧藩庫附貯項下借放各款分別登銷追賠恭摺具

奏仰祈

聖鑒事竊照江寧藩庫附貯項下歷任借放各款前據藩司詳報設局清釐當將查辦情形具

奏欽奉

諭旨陶澍奏藩庫附貯項下借放各款分別查辦一摺江寧藩庫附貯一項歷任藩司均有借放之款經該藩司設局清釐除陸續歸補外尙有未歸借

款銀二十六萬四千七百七十三兩零所有兩淮
運司衙門欠解銀四萬四千一百四十二兩零江
寧巡道衙門欠解銀三千九百八十七兩零江淮
各屬欠解並已入清查追補銀十一萬三千一百
七十四兩零著卽催解歸款毋得再有延宕其無
著銀六萬一千二十二兩零卽著分年分任按款
追補至蘇藩司並安徽省各欠款著該撫分晰查
明應還款者速卽催解歸款應追者同前項一併
催追賠補應豁者按例核辦務令各歸各款掃數
清還毋任糾纏輻致滋弊混欽此卽經恭錄轉

行欽遵查辦去後據藩司張志緒移查核對按款清釐分別有著無著造冊詳請具

奏前來查江寧藩庫附貯項下借放各款共銀二十六萬四千七百七十三兩零除有著借款現經放歸並兩淮運司解還歸款共銀二千六百七兩零外實該未歸銀二十六萬二千一百六十六兩零內安藩司欠解有著銀八千九百二十五兩零蘇藩司欠解有著銀一萬五千四百二兩零兩淮運司欠解有著銀四萬二千七百六兩零江寧巡道欠解有著銀三千九百八十

七兩零江淮各屬欠解並已入清查追補銀一十一萬二千六百三十三兩零又蘇藩司劃抵寧庫應行放歸並已入清查追補銀七千四百二十五兩零皆係有著之項應分別催追歸款實該無著銀七萬一千七百一十四兩零內除江寧省已入二次清查及叅案積欠官墊民欠案內奉准豁免銀八千二百九十四兩零又安徽省報入歷次清查豁免並提解安藩司庫經安省借放無著奉准豁免銀四千八百三十七兩零共銀一萬三千一百三十一兩零均係已

奉豁免之項應請就款登銷尙該無著銀五萬
八千五百八十二兩零內江寧省無著銀五萬
二千七百二十八兩零安藩司欠解無著銀四
千一十九兩零蘇藩司欠解無著銀一千八百
三十五兩零均屬無可催追推究其源皆係從
前歷任江寧藩司濫行借放所致應請著落經
借各員名下按數追賠除飭令將各司道衙門
欠解有著銀兩催追歸款一面查造追賠員名
銀數細冊詳請咨追外所有清釐江寧藩庫附
貯借款緣由謹會同督臣琦善恭摺具

奏伏乞

皇上聖鑒再此案前准部行飭取已未歸補細冊查
此次清釐附貯各款皆係在外支銷之典息開
款並攤捐各款與報部之正款錢糧不同應請
免其造冊送部以省案牘合併陳明謹

奏

道光七年四月十五日具

奏五月十五日奉

硃批另有旨欽此同日奉到道光七年五月初一日
日內閣奉

上諭陶澍奏藩庫附貯項下借放各款分別登銷追
賠一摺江寧藩庫附貯一項前因設局清釐降旨
令該撫查明分別催解追賠歸款茲據奏借放各
項除解還外實未歸銀二十六萬二千一百六十
六兩零內欠解有著銀及已入清查追補各款俱
係有著之項著卽分別催追無任延宕其無著銀
除已入二次清查及業准豁免由該撫就款登銷
外尚該無著銀五萬八千五百八十二兩零均屬
無可催追卽著落經借各員名下按數追賠該撫
卽查造員名銀數細冊迅速分別咨追歸款此項

銀兩係在外支銷典息閒款並攤捐各款與正項
錢糧不同著免其造冊報部該部知道欽此

故員追項無完請俟伊子補官坐扣摺子附片一件
奏爲追項無完請俟補官坐扣俸廉清款循例恭

摺奏祈

聖鑒事竊照籍隸江蘇太湖廳原任直隸灤州已故
知州王仲湘虧欠祁州任內積年徵存未解地
糧銀七千三百四十八兩零先准戶部暨直隸
省行文飭追節據地方官查訊地鄰親族人等
結覆該故員家產盡絕伊子王希賢貧難措繳
等情經前撫臣據情咨部旋准部駁又經行司
飭追在案嗣於道光六年九月接准部咨據候

選通判王希賢呈稱伊父王仲湘虧欠前銀請
照奏定章程俟銓選得官之日在於應得俸廉
內按年坐扣清完等情查該員原籍已據結報
並無家產核與奏准成案雖屬相等惟王仲湘
尚有未完灤州祁州二任內續虧倉庫銀七千
九百八十七兩零又續行查出補追各款銀二
百六十兩零核計三共應追銀一萬五千五百
九十六兩零數在一萬兩以上行令遵照定例
及奏准成案奏明辦理等因遵卽飭再覆查詳
辦去後茲據蘇州府知府陳鑾以王希賢現在

遷居元和縣境內行據該縣何士祁復加確查實係赤貧如洗並無捏飾取具印結由蘇州布政使梁章鉅轉詳請

奏前來臣查例載凡應追一切賠項無論本身子嗣族籍任所查無財產隱寄具結咨部後准照現任俸廉扣繳有官未補者候補官日再行坐扣數在一萬兩以上者專摺奏明等語又道光五年十一月戶部奏准直隸省積欠續虧兩案凡遇子孫代賠實係力不能完任所族籍查無財產隱寄具結送部請全扣俸廉完繳者均應

准其全行坐扣以昭畫一各等因在案今故員
王仲湘未完直隸省虧欠等款共銀一萬五千
五百九十六兩零業經節次嚴查並無資產隱
寄實係力不能完應請准俟該故員之子候選
通判王希賢補官之日在於應得俸廉內全行
坐扣完款除印結咨送戶部查核外理合循例
恭摺具

奏伏乞

皇上聖鑒勅部核覆施行謹

奏

道光七年四月十五日具

奏五月十五日奉到

硃批戶部議奏欽此

再查江蘇省三次清查案內各屬開報無著銀
兩江淮等屬每年酌提羨餘銀二萬三千三百
兩蘇松等屬每年酌提羨餘銀六萬兩陸續彌
補經部議准按年提解在案茲據江寧藩司張
志緒蘇州藩司梁章鉅會詳稱此項派提銀兩
原出自各州縣辦公節省之餘如地方被災辦
公已屬拮据勢難責令完解請凡被災之年各
按災分輕重分別提免詳請核

奏前來

臣

查派提銀兩本出自辦公節省之餘酌
盈劑虛惟力是視如被災之年則本缺辦公即

多支絀無從更有贏餘若一律派提勢不免於別有挪動似應量爲變通凡遇大災之年錢糧全行蠲緩該州縣羨餘銀兩應請全行免提如非通境被災則就其應徵錢漕尙有若干以定其應解羨餘之數如被災本輕僅居通境一隅中之一隅仍照原數派提道光六年江寧各屬被災之處請卽照此辦理如此分清災熟旣免州縣辦公竭蹶亦不致別有挪移於彌補較爲核實至清查無著原議分八年彌補茲議因災免提亦惟被災之處稍展月時於清查章程並

無窒礙合併附片具

奏伏乞

聖鑒謹

奏

道光七年四月十五日附

奏五月十五日奉到

硃批戶部議奏欽此

道光七年閏五月二十五日准

戶部咨內閣抄出江蘇巡撫陶澍奏江蘇省三次清查案內酌提羨餘彌補無著銀兩遇災之

年請分別提免一摺臣等悉心妥議請將大災年分通境被災之州縣應提羨餘全行展提一限此外被災僅止一隅或並非通境被災仍概按數依限派提如蒙

俞允所有道光六年江寧全境被災各屬應提羨餘卽請飭令該撫臣查明准展一限以示體卹仍於該年奏報單內分別展提若干提補若干劃清數目詳晰開列以便稽核竊維辦理清查特奉

皇上格外施恩免灾致虧之由俯允籌補之請原期

帑項有益全在該撫臣悉心體察實力催提固
不可使州縣因災受累致滋挪移亦不可任州
縣借災拖展致無著之款終歸懸擱庶於彌補
有裨而清查益昭核實再道光五年奏報單內
未將該年彌補羨餘若干劃清開報併請

飭令該撫臣查照臣部前咨分晰咨覆備查謹將
等核議緣由恭摺具

奏伏乞

皇上訓示施行謹

奏

道光七年五月二十四日具

奏本日奉

旨依議欽此

御賜藥錠謝

恩摺子

奏爲恭謝

天恩仰祈

聖鑒事頃臣摺弁回蘇奉到

御賞藥錠一匣謹卽恭設香案望

闕叩頭祇領欽惟

皇上醇涵六合

康濟四生氣靖龍沙奠瘡痍而播凱

恩覃鴻澤普康樂以成書八表同孚勿藥之占

九重倍切如傷之念節逢地臘

寵賚天珍

壽寓莠英蕭露釀八瓊之液

洪鈞鍊冶芝雲呈五色之輝依寶鼎以縈煙擎來

闕北映尖絲而續縷捧到江東臣識愧荅通職慚

艾蓄每屆恢台之令序屢邀靈劑之

榮頒秘馥遙分是

天上金蟾之髓葳蕤乍啟開人間玉燭之祥分馨爰
逮夫寅寮布惠尙思夫子庶從此和平載

福慰

一人保赤之忱還應調燮論功勵百爾披丹之悻所
有臣感激悚幸下忱謹繕摺恭謝

天恩伏祈

皇上聖鑒謹

奏

道光七年五月十五日具

奏閏五月二十日奉到

硃批知道了欽此

奏請獎勵催漕出力各員摺子

奏爲江境催漕全竣請將尤爲出力各員酌懇

恩施以資鼓勵事竊照本年漕運欽奉

特旨勒限四月二十日以前趕抵禦壩渡黃臣因本

年漕運攸關河務機宜必須節節趕早而大江

以南漕額最重開行在前向稱疲敝兼徒陽爲

運道咽喉水無來源專藉江潮灌注是以去臘

估挑時卽遴派幹員將古淺之豬婆灘等處搜

挑淨盡飛飭各幫星夜兌開並將藉詞支緩之

幫弁叅撤俾資儆惕其時蘇州府陳鑾松江府

李景嶧所屬漕米尤多備極籌畫同蘇州府通
判清平候補同知福隆阿等催償尤力正月望
間各船卽掃數就道經過常鎮各境毫無停留
適值西風阻渡雨水未流徒陽淺阻經臣親詣
督辦率同各員弁設法償渡接奉

諭旨徒陽運河開壩後因西風大作江水消耗以致
漕行淺阻卽已近江口之船亦難逆風對渡現在
該撫設法疏通加用天關地牛挽曳總須遵照前
旨於四月二十日以前全抵禦壩愈早愈妙斷不
可誤渡黃期限是爲至要等因欽此卽經臣督率

常鎮道劉名載鎮江府竇欲峻暨同知富康劉
挺守備積昌盧奎光等各員弁分段籌催將小
淺處所竭力甯撈兼用鐵箕拉刮復經丹徒縣
吳浚於利涉河邊捐廉另抽溝道旁納江湖遇
小汛時卽排車戽水接濟其橫越二閘專派閘
官陶佩玉晝夜巡守按時啟閉自黃泥壩至丹
陽境內專派署縣張祈諤帶同知事陳洙擇要
爬疏仍派蘇州府陳鑾縣丞周恭壽等來往迎
提彈壓不遺餘力截至二月二十三日蘇松等
屬漕船掃數渡江其浙江過境軍船亦卽於三

月初十日渡竣統計兩省軍船六十四幫爲船二千八百五十號數居全漕三分之二皆由徒陽僭渡比之道光元二三四等年均早至一月有餘因難轉速實爲從來未有各該員謹遵

欽限仰承

諭旨竭力僭辦雖值潮枯期促漕行倍疾得以趕抵禦壩趁大汎未發之前一氣飛挽源源北上是本年軍船渡黃迅速實亦由渡江各船僭辦較早之故較往年地方催漕情形迥不相同所有在事出力人員與催僭渡黃各員事同一律未

便沒其微勞查常鎮道劉名載蘇州府知府陳
鑿松江府知府李景嶧鎮江府知府竇欲峻籌
畫有方備極辛勤但係道府大員不敢仰邀議
叙所有尤爲出力之丹徒縣知縣吳浚金壇縣
縣丞周恭壽鎮江府知事陳洙丹徒開闢官陶
佩玉可否仰乞

天恩以應陞之缺陞用署丹陽縣大挑分發知縣張
祈諤請儘先補用鎮江府海防同知富康坐補
蘇州府督糧同知福隆阿揚州府同知劉挺蘇
州管糧通判清平蘇州營叅將石成玉鎮江營

守備盧奎光均請交部從優議叙如蒙

俞允不特該員等感激

鴻施倍加奮勵卽臣等遇事緊要亦得收指臂之效
至其餘出力各員容臣飭司記功以勵將來謹
會同兩江總督臣琦善繕摺具

奏伏乞

皇上聖鑒訓示施行謹

奏

道光七年五月十六日具

奏閏五月二十日奉到

硃批另有旨欽此又同日奉到道光七年閏五月初四日內閣奉

上諭陶澍奏催漕全竣出力各員請予鼓勵一摺江蘇徒陽運河前因江水消耗漕行淺阻經該撫督率道府將弁等分段籌催竭力僨辦將蘇松等屬及浙江漕船於大汛未發以前全數趕抵禦壩飛挽北上較往年早至一月有餘在事出力各員自應量予鼓勵所有常鎮道劉名載蘇州府知府陳鑾松江府知府李景嶧鎮江府知府竇欲峻俱著加恩交部議叙其尤爲出力之丹徒縣知縣吳浚

金壇縣縣丞周恭壽鎮江府知事陳洙丹徒閘閘
官陶佩玉均著以應陞之缺陞用署丹陽縣大挑
分發知縣張祈諤著儘先補用鎮江府海防同知
富康坐補蘇州府督糧同知福隆阿揚州府同知
劉埏蘇州府管糧通判清平蘇州營叅將石成玉
鎮江營守備盧奎光俱著交部從優議叙該部知
道欽此

酌議三次清查案内子孫代賠追補請量爲變
通摺子

奏爲酌議蘇省三次清查案内子孫代賠追補章
程請量爲變通以歸核實仰祈

聖鑒事竊照江蘇省辦理三次清查凡本員欠繳銀
兩按銀數多寡分限勒追完不足數現任之員
分別撤任革追查抄備抵候補之員分別扣委
扣補革追抄抵至本員已故其子孫尙在出仕
係現任知縣以上者照現任人員定限著追如
候補州縣以下等官及雖未出仕而家資尙豐

者照候補人員酌展年限經前撫臣

奏准遵行在案茲據江寧蘇州兩藩司詳稱上屆
二次清查於子孫代賠係照戶部承追定例辦
理今三次清查子孫代賠一經逾限卽與本員
虧挪者一律叅追似屬無所區別請凡有代賠
之子孫如查係家產尚豐者無論有官無官悉
照戶部定例著追如查明並無家產有官者坐
扣廉俸無官者由本旗籍確查結報亦照定例
辦理等情詳請具

奏前來

臣

查本員所欠清查案內官欠追賠銀兩

逾限不完叅革監追乃其罪所應得如本員已
故子孫代賠突與本身虧挪有間若概子叅革
監追未免漫無區別况同一代賠之子孫一經
查明家產盡絕無官者可以釋然無累而有官
者卽須叅追亦未免事涉偏枯且各員中賢愚
不一其巧於彌縫者既難免借端以詭取其急
圖掩飾者或竟致挪舊以虧新至尙未得缺各
員更屬無從設措卽扣其委補加以叅追亦屬
窒礙徒增難收實效伏查戶部定例凡應追一
切賠項銀兩總以有力無力爲斷其力能完繳

者無論本身子嗣均令按限完繳至無力完繳有官者准照現任俸廉扣繳有官未補者俟補官日再行坐扣溯查嘉慶二十年蘇省辦理二次清查會議將代賠之子孫就現任候補分別扣限經

欽派大臣改議以追繳限期較成例互有寬嚴未免徒事更張應仍照向例辦理等因遵照在案今三次清查將子孫代賠者仍就現任候補人員分別扣限是但以官計而不論其無力有力與定例及上屆章程均屬不符於事勢亦未允協臣

細加察核應請將三次清查案內子孫代賠銀款如查係家產尙豐者無論有無官職均按銀數多寡查照戶部承追定例著追如家產先已查抄或雖未查抄而咨查家產實係盡絕無可著追有官者均准其將現任及署任補官之日應得俸廉全數扣繳現在本省及在外省之員一體辦理無官可補者卽由本旗籍確查結報亦照定例辦理庶代賠之子孫不致與虧欠之本員無所區別旣與戶部定例相合亦與上屆清查相符核之此次原議章程較爲平允而有

產者仍行著追無產者扣其俸廉於彌補庫項均歸切實矣所有酌量核辦緣由謹會同督臣琦善恭摺具

奏伏乞

皇上聖鑒訓示謹

奏

道光七年五月十六日具

奏閏五月二十日奉到

硃批戶部議奏欽此

道光七年七月初二日准

戶部咨內閣抄出江蘇巡撫陶澍奏江蘇省三
次清查案內子孫代賠追補章程奏請量爲變
通一摺臣查道光四年江蘇省辦理三次清查
案內據前撫臣韓文綺奏定追補年限三千兩
以下限半年三千兩以上限一年五千兩以上
限二年一萬兩以上限四年一限不清先行離
任統限屆滿繳不足數革職監追查封備抵若
本人已故其子孫係現任知縣以上者照現任
人員定限著追如係候補州縣以下等官及雖
未出仕而家貲尙豐者均照候補人員加半扣

展免其先行降革經

臣

部議准在案是子孫名

下著追並非漫無分別茲據撫

臣

陶澍奏稱同

一代賠之子孫一經查明家產盡絕無官者可

以釋然有官者卽須叅追事涉偏枯且子孫代

賠究與本身虧挪有間亦難概子叅革監追請

將三次清查案内子孫代賠銀款如家產尙豐

者無論有無官職均按銀數多寡查照戶部承

追定例著追如家產盡絕有官者均准其將現

任及署任補官之日應得俸廉全數扣繳等語

查原議章程追補款內子孫名下本無一律叅

革監追查抄明文自當分別有力無力酌量變
通如實係家產盡絕由該旗籍及歷過任所查
明結報應請如該撫所奏有官者准其將現任
及署任補官之日應得俸廉全數扣繳以示矜
全惟子孫代賠追繳年限業已分別酌展且更
免其降革若如該撫所請有力者亦查照承追
定例著追較之三次清查追繳年限倍加展緩
自未便以奏定章程復行議改轉致追補無期
伏思辦理清查奏蒙

皇上格外施恩姑免叅辦勒限追補已邀法外之仁

原期

帑項有著應請

勅下該撫臣仍按三次清查該省原奏議定年限分別著追不准拖延至子孫或無官職結報家產盡絕乃三次清查案內應歸無著彌補之款前經臣部議令該撫臣將來如何籌補俟各員追限滿後查明無著銀數多寡妥議專款具奏茲該撫奏內未據籌及並請

勅令該撫臣查照前議辦理庶無著之款不致終歸無著而清查亦昭核實謹將核議緣由恭摺具

奏伏乞

皇上訓示施行謹

奏

道光七年六月初一日具

奏本日奉

旨依議欽此